

বেরঙিন সময়ে

-মিতালী দে

সুরক্ষা কবচ ছিঁড়ে ফুড়ে আচম্বিতে - অমিত্র
সঙ্গোপনে, নীরব পদচারণায়
গভীরতার দিকে ।

জিরোয় - হয়তো কয়েকটা দিন নির্মম নৈঃশব্দে
সময়ের অবগাহনে রক্তপলাশ বাধা ছড়ায়
কুঁড়ে কুঁড়ে খায় সারাৎসার ।
লুকানো প্রখর নখগুলো থাবার ভেতরে বিশ্রামে ।
বিপন্ন সময়ে - জীবন তখন বেসামাল,
করুন কান্নায় ।

অস্থির এক একদিন সুদীর্ঘ অসংলগ্ন
নিঃসহায়,
বিধাতার দরবারে সমর্পনের প্রার্থনায় ।
কালান্তরে চলে যাওয়া জীবনের যত -
ঘাত প্রতিঘাত, গুপ্ত অপরাধ, অবৈধ যন্ত্রণার
আকর সামনে আসে, কৈফিয়ত চায়, কৈফিয়তে
কৈফিয়তে জেরবার ।

উথাল পাতাল সময়ে-
ঘাতক তখন বিচারকের ভূমিকায় ।

